

# *Guidelines*



MUSIC  
WEEK  
2024  
**5-11 AUGUST**

Prepared by:  
Independent Church of India  
**ASSEMBLY MUSICAL BOARD**

“A hun a tlung ding a ni tah, tu khawm hin a tlung zing tah, chu pha chun Pathien chibai bûktu tak tak haiin Pa chu Thlarau le Titak zetin chibai bûk an tih, Pa chun chuong ang mi chu ama chibai bûk tu dingin a zawng sih a. Pathien chu thlarau a nih, Ama chibai buktuhai chun Thlarau le titakzetin an biek ding a nih.”  
(Jn 4:23-24)

## **DAY 1 (5<sup>th</sup> August, 2024)**

### **LUNGRIL LE TITAK ZETA PATHIEN CHIBAI BUK – I**

Pathien hi lungril le titak zeta chibai bûk ding a nih (Jn 4:23-24)

- (i) Pathien biekina inkhawma ei fe hin Pathien chibai bûk le chawimawi dinga fe ei tih ti inhre hmasa tak ei tiu.
- (ii) Pathien be le chawimawi ding ei ni leiin inthuum le inchei dân khawm inchawi tawka fe ding a nih.
- (iii) Pathien be dinga fe eini leiin biek in tuola um hnu fuola hohlim lova biek in lut nghal hi a ðha

*Hriltlang ding: Worship ðan hnung le inkhawm sunga tuola biek in tuola um hlak hai hi Pathien be dinga hung ni thei an ti? Annawleh Pathienni (Sunday) an inser ve hrim hrim.*

## DAY 2 (6<sup>th</sup> August, 2024)

### LUNGRIL LE TITAK ZETA PATHIEN CHIBAI BUK - II

Pathien hi lungril le titak zeta chibai bûk ding a nih. (Jn 4:23-24)

- (i) Pathien biekina ei fe hin inpakna hla saka Pathien inpâk ding eini lein Bible chauh chawi lovin, Hlabu khawm chawi ngei a tha. (Inkhawm sung na na na chu Bible nek hmanin Hlabu hi ei hmangrawn lem a nih)
- (ii) Thei tawpa rawl insuo a, lungril le titak zet a Pathien inpâkna hla sak ding ei nih.
- (iii) Pathien inpakna hla (Kristien Hlabu le Independent Kohrana hla hai hi) hrietrawn tum ding a nih. (Hla hre saa pieng tu khawm ei um nawh a, a taima main anhrietrawn el a nih)

*Hriltlang ding: Pathien chibai buk dinga fe sia Bible/Hlabu chawilo ei tam em em nasan hi ieng lei am ning a ta? Mimal mawphurna ani el khela Kohran khawma hma lak na ding ei nei vein ei hriet am?*

## DAY 3 (7<sup>th</sup> August, 2024)

### PATHIEN ROPUI LE THIENGLIM A NIH

Ei biek Pathien hi Pathien ropui le Thienghlim a nih (Isai 6:1-6)

- (i) Ei biek Pathien hi Pathien ropui le thienghlim a ni lein Ama bea ei inkhawm sung hin inza tak le ursun taka um ding a nih.
- (ii) Hla sak huna sak a, thu ngai huna ursûn taka ngai a, a ÷ul hle naw chun ÷awng lo ding.
- (iii) Baua sada, khaini, dumhmuom, *talab* etc um zinga Biekin lût lo ding.
- (iv) Inkhawmnaa Thawlawm dawl ding a ni chun, ina inthawka siemrel saa chawi a tha

*Hriltlang ding: Biekin sunga baua thil um puma lut dam, mani chanvo/mawphurna zo hnunga ÷awngtai laia suok zaua baua thunlut ei nei hlak hai dam hi Pathienin a lawmnaw ding a nih ti hrezing puma ei la thaw tho hi ieng lei am ning a ta?*

## DAY 4 (8<sup>th</sup> August, 2024)

### PATHIEN HI RIMAWI HAI LE CHAWIMAWI DING A NIH

Ei Pathien hi Rimawi hai le chawimawia inpâk a phu a nih  
(Sâm 92:1-4)

- (i) Ei Pathien hi Pathien ropui, mi Samdamtu Pathien a na, khuong le rimawi dang dang hmanga inpâk a phu a nih.
- (ii) Khuongpu, hla ðhwoitu le rimawi remtu (keyboard hmettu) hai chu mi hmaa lo tlunga, hla hai lo thlangfel a, thiem taka hlasak an ðhwoi ding a nih.
- (iii) Inkhawm a fe hai po po khawm thei tawpa Pathien inpâka hlasak hi ei thaw makmaw a nih.

Hriltlang ding: *Khawvel hung changkang pei anga instrument dang dang hai khawm ei belsa pei hai hi a pawina um a tim?*

## DAY 5 (9<sup>th</sup> August, 2024)

### PATHIEN EI INPAKNA DING SANHAI

- (i) Ei suolhai ngaidamtu le ei natnahai sukdamtu a ni leiin ei inpak ding a nih (Sam 103:3). Mihriemin ei mamawtak chu Pathien ngaidamna a nih. Ngaidamna hin thil chi hni a fun sa a (a) Suol inkhum pék ti le (b) Hrietnaw tehlem thaw hi a nih (Sam 32:1,2). Ei suolna chu a mi ngaidam chau ni loin, tukhawm ihmu lo dinga inkhumpek a nih; chau khawm chu ni loin Ama ngei khawmin ‘hrietnaw tehlem’ a thaw a nih. Chuong ang lawma ngaidamna ropui chu Pathiena chau hin a um (Sam 130:4) Chuleiin, Pathien ei chawimawiin, ei inpak mawl mawl ding a nih.
- (ii) Sak le thlang ân hlat angin ei bawsietna chu hla takah a mi sie hmang pek ta leiin (Sam 103:12).

Hriltlang ding: *Music thiem, solfa certificate nei Kohran rawngbawlna ah hmang thei ni ngai lo tam tak el ei um hi Kohranin anni hai ta ding hin ‘platform’ ei siem pek pei ðha in ei hriet am? Ieng ang takin am hma lak ðhang a ta?*

## DAY 6 (10<sup>th</sup> August, 2024)

### **PATHIEN INPAK LE CHAWIMAWI HI HMELMA HNENA HMANGRUO THATAK A NIH.**

(i) Davidin tingtang a kei pha chun Saula sunga khawhri khawmin a suoksan hlak a nih (1 Sam.16:23). - Rimawi ei ti hi khawvel thil ringawt a ni nawh a, Pathien chu a bul tumtu niin, ringtuhaiin hmelma ei hnena dinga Pathien hmangruo a lo ni zing a nih. (Ror. 7:22; Deut.31:19-21)

(ii) Jehosaphat le a rawihaiin Pathien chibai buka, inpakna hla an sak chun an hmelmahaiin an lo tlan san a nih (2 Chro.20:22). Chibai buk le chawimawi hi Setan khawma a nuom tak a ni leiin ama hi chibai buk dingin Isu meu khawm a thlem ngam a nih (Mt.4:9). Nisienlakhawm, Pathien inpakna hmuna chun Pathien a thang nuom tlat leiin, Setan a thangve ngam nawh a, ringtuhai a tlan san hlak a nih.

*Hriltlang ding: Covid-19 hripui inleng lai ni sien, Manipur buoi leia a kâkhawk phaka umhai ni sien, inkhawm hun haia Hlasak remchang lova hrietna hi iem ei ngai dan? Suol hmangruo ni thei a tim? Kohranhai hi hnea ei umzie suklangna ni theiin ei ngai am?*

## DAY 7 (11th August, 2024)

### **LAWMTHU HRIL LE INPAK PUMA BIEKIN LUT DING EI NIH**

(i) A chang hin chu insung harsatna dam le lungril inrim taka hringnun ei hmang chang hin Biekin hi pei naw ngawi ngawia ei pan châng a um hlak. Lawmna hrim hrim neilo ang hiea Biekin ei lut châng a tam. Nisienlakhawm Sam ziektu chun **“Lawmthu hril pumin a kawtkhara chun lut unla, Inpak pumin a biekin inhuonna sung tuollai a chun lut ro’ (Sam 100:4)** a lo tia, Pathien pawlna (fellowship), Pathien umpuina (presence), Pathien thlamuongna (peace) le a malsawmna hai chen khawm ei dawng ding chun lawm a tula, lungrila ei lawm el kha a dittawk naw, ama Inpak khawm ei thaw ding a nih.

(ii) Hringnun ah Pathien kuomah ei lawmthu hrilna ding tamtak a um, ei inpakna san ding tamtak a um, Tap hla 3:23 “Zing tinin an thar a; I ringumna chu a ropui a nih”. Zing tinah Pathien ringumna ei dawng lei dam, sungkuo a mi pek lei dam, fak le dawn a mi pek lei dam, hriselna a mi pek lei dam, ruotui malsawmna a mi pek lei dam etc. Hieng hai popo lei hin Pathien bieknna hmuna ei lut hin lawm pum le Ama inpak puma lut hi a phu a nih.

*Hriltlang ding: Ieng ang in am congregational singing hi tuta ei ngirhmun nekin hma sawn pei thei ei ta? Ei Local Kohran bika dinga hriltlang ding.*

## **MUSIC WEEK HMANG SUNGA HRIET DING ṬULHAI**

1. Music Week ani leiin zan tin inkhawm ning a ta, Local Music Committee in Local Church Committee le inhrepawin program siem a tih. Pathienni Zan inkhawm hunah thawlawm Local Music Committee fund ding lakkhawm ning a tih.
2. Local Music Committee in zantina ding Worship Leader, Khuongpu, Hla inzawttu, Guitar/Bass/Keyboard (a um chun) ruotin, ruota um hai hin ṭawngṭaina le nasataka inbuotsaia a hma lawka hlasak ding hai lo en lawk pei hlak ding a nih.
3. Inkhawm tan hun chatah mipui hlasak an hawi theina dingin inkhawm fe hmasa sahai chu Biekin sunga inngḥak khawm hi thaw ngei ding a nih.
4. Guidelines siema um hi Subject Latu hai ṭhangpuitu ding chau a nih. Mani remchang ang peia a subject le inzuola belsa pei el ding a nih.
5. Music Week inkhawm hun sung Kristien Hlabu, Independent Hlabu, Hlamawi Bu a hai hla thar a tam thei angtak Kohran member hai inchuktur dan ngaituo ding.
6. Guidelines Booklet (A5 setting) a hrana print a um nawa, pdf file ah hung thawn dar el a nia, Presbytery/Field/City Church tinin ei pawimaw dan anga lo thawndar / print el dingin ei inngen a nih.
7. Music Week 2024 hlimumtak le malsawmna tamtak dawnga hmang seng dingin ditsakna insangtak kan inhlan cheu.

- Assembly Musical Board  
Independent Church of India